

私愛也用六律者生之與殺也賞之與罰也與之與奪也非此無道也伐亂禁暴興賢良廢不肖匡表以為正攘險以為平矯枉以為直明施舍開塞之道乘時因勢以服役人心者也帝者不體陰陽即侵王者不法四時即削霸者不用六律即辱君者失準繩即廢故小而行大即窮塞而不親大而行小即狹隘而不容

不曰皇而曰帝曰王曰霸曰君何哉尊皇也帝者失道而後德王者失德而後仁霸

者失仁而後義君者失義而後禮大者立則小者在焉小者立則大者失矣

老子曰地廣民衆不足以為強甲堅兵利不可以恃勝城高地深不足以為固嚴刑峻法不足以為威為存政者雖小必存為亡政者雖大必亡故善守者無與禦善戰者無與聞乘時勢因民欲而取天下故善為政者積有德善用兵者畜其怒德積而民可用也怒畜而威可立也故文之所加者深權之所服者大德之所施者博威之所制者廣廣則我強

而敵弱善用兵者先弱敵而後戰故費不半而功十倍千乘之國行文德者王萬乘之國好用兵者亡王兵先勝而後戰敗兵先戰而後求勝此不明於道也

行文德者雖小必存好用兵者雖大必亡夫善為政者積其德善用兵者畜其怒惟知兵本以止亂而不以為亂則民不傷而國長存

通玄真經續義卷之九

通玄真經續義卷之十

非十

上仁篇

老子曰君子之道靜以修身儉以養生靜則下不擾儉則民不怨下擾則政亂民怨則德薄政亂賢者不為謀德薄勇者不為闘亂主則不然一日有天下之富處一主之勢竭百姓之力以養耳目之欲志專於宮室臺榭溝池苑囿猛獸珍怪貧民飢餓虎狼厭芻秦百姓寒凍宮室衣綺繡故人主畜茲無用之物而天下不安其性命矣

上仁者靜以修身儉以養民君子之所當為者也下擾政亂民怨德薄君子不為矣首作無益以害有益畜無用以害有用哉老子曰非淡漠無以明德非寧靜無以致遠非寬大無以制斷以天下之目視以天下之耳聽以天下之智慮以天下之力爭故號今能下究而臣情得上聞百官修達群臣輻湊喜不以賞賜怒不以誅罪法令營而不苛耳目通而不聞善否之情日陳於前而不逆故

賢者盡其智不肖者竭其力近者安其性遠者懷其德得用人之道也

淡漠寧靜寬大正平仁政之事也夫用人之道以天下之目視耳聽則聰明廣以天下之智慮力爭則功業大故賢者盡智愚

者竭力近者懷恩遠者服德此三代之所以久後世無以及之

夫乘輿馬者不勞而致千里乘舟楫者不游而濟江海使言之而是雖商大筭筦猶不可棄也言之而非雖在人君卿相猶不可用也

是非之處不可以貴賤尊卑論也其計可用不羞其位其言可行不貴其辯闇主則不然群臣盡誠効忠者稀不用其身也而親習蒙枉賢者不能見疏遠卑賤竭力盡忠者不能聞也有言者窮之以辭有諫者誅之以罪如

此而欲安海內存萬方其離聰明亦以遠矣造物假我則有奪我則無假之為用大矣哉夫輿馬之代步舟楫之濟涉千里可不勞而至者假得其力也君假臣以為治臣假君以行志失假借之用獨夫而已惟明

君而後足以與此

老子曰能尊生者雖富貴不以養傷身雖貧賤不以利累形今受先祖之遺爵必重生之所由來久矣而輕失之豈不感哉故貴以身治天下則可以寄天下愛以身為天下乃可以託天下

人莫重於生而曰尊生尊生者無奢欲殺身之害也人受父祖之澤而不自保守過有求於所養反至喪身傾家之禍者感滋甚矣

文字問治國之本老子曰本在於治身未嘗聞身治而國亂身亂而國治也故曰修之身其德迺真道之所以至妙者父不能教子子亦不能受之於父故道可道非常道名可名非常名也

國之本在家家之本在身文字問治國之本老子語以本在治身則是身治而後家治家治而後國治矣身猶國也國猶身也詩云執柯伐柯其則不遠文字問曰何行而民親其上老子曰使之以

時而敬慎之如臨深淵如履薄冰天地之間善即吾畜之不善即吾讎也昔者商夏之臣反讎桀紂而臣湯武宿沙之民自攻其君而歸神農氏故曰人之所畏不可不畏也舜有善行天下慕之文字問何行而民親

其上老子語以使之以時而敬慎之善即吾畜不善即吾讎則是君之視臣如犬馬臣之視君如寇讎矣民能戴君能覆君斯可畏也

老子曰治大者道不可以小地廣者制不可以狹位高者事不可以煩民衆者教不可以苛事煩難理法苛難行求多難贖寸而度之至丈必差銖而稱之至石必過石稱丈量徑而寡失大較易為智曲辯難為慧故無益於治有益於亂者聖人不為也無益於用有益

於費者智者不行也故功不厭約事不厭省求不厭寡功約易成事省易治求寡易贖任於衆人則易故小辯害義小義破道道小必不通必簡量有寬狹智有淺深地廣民衆非淺智狹

量所能理況任高治大其可以叢勝根情
為哉小辯害義小義害道此小人之事也
君子不為矣

河以遠遠故能遠山以陵遲故能高道以優
游故能化夫通於一伎審於一事察於一能
可曲說不可廣應也夫調音者小弦急大弦
緩立事者賤者勞貴者佚道之言曰芒芒昧
昧因天之威與天同氣者帝同義者王同功
者霸無一焉者亡故不言而信不施而仁不
怒而威是以天心動化者也施而仁言而信
怒而威是以精誠為之者也施而不仁言而
不信怒而不威是以外貌為之者也故有道
以治之法雖少足以治無道以治之法雖衆
足以亂

小器易盈必不可久大器晚成必得其壽
與天同氣者帝同義者王同功者霸無一
者亡故有道以理之則法簡而易治無道
以理之則法煩而易亂
老子曰鯨魚失水則制於螻蟻人君舍其所
守而與臣爭事則制於有司以自為持位守

職者以聽從取容臣下藏智而不用反以事
專其上人君者不任能而好自為則智日困
而自負責數窮於下則不能伸理行墮於仁
則不能特制智不足以為治威不足以為刑
即無以與天下交矣喜怒形於心嗜欲見於
外即守職者離正而阿上有司枉法而從風
嘗不啻功誅不應罪即上下乖心君臣相怨
百官煩亂而智不能解非譽請生而明不能
照非己之失而反自責即人主愈勞人臣愈
佚是代大匠斲也夫代大匠斲者稀有不傷
其手矣

人主失道受制於臣猶鯨魚失水為蟻所
制也夫為君之道在乎命賢擇相而已相
得其賢百官未有不正天下未有不治一
失所守而與臣下爭能者不待下之所制
將自困矣

與馬逐走筋絕不能及也上車攝轡馬使衡
下伯樂相之王良御之明主乘之無御相之
勞而致千里善乘人之資也人君之道無為
而有就也有立而無好也有為即議有好即

諛議即可奪諛即可誘夫以連而制於人者
不能治國故善建者不拔言建之無形也唯
神化者物莫能勝中欲不出謂之高外象不
入謂之閉中局外閉何事不節外閉中局何
事不成故不用之不為之而有用之而有為
之不伐之言不奪之事循名責實使自有司
以不知為道以禁苛為主如此則百官之事
各有所考

夫與馬逐走是君與臣角力也登車致遠
是任臣以成治也有為即議有好即諛唯
神化者凡用可節私謁不行官盡職而事
有考矣

老子曰食者民之本也民者國之基也故人
君者上因天時下盡地利中用人力是以奉
生遂長萬物蕃植春伐枯槁夏收百果秋蓄
蔬食冬取薪蒸以為民資生無乏用死無傳
尸先王之法不掩羣而取賦既不涸澤而漁
不焚林而獵豺未祭獸宜罟不得通於野獮
未祭魚罟罟不得入於水鷹隼未擊羅網不
得張於谷草木未落斤斧不得入於山林昆

蟲未藝不得以火田育孕不殺穀卵不探魚不長尺不得取犬豕不期年不得食是故萬物之發生若蒸氣出先王之所以應時修備富國利民之道也非目見而足行之也欲利民不忘乎心則民自備矣

富國者民養民者食基本之論也因天時盡地利用人力三才之道備然後羣生遂長萬物蕃植民賴以食國藉以富豈不謂生財有大道者乎

老子曰古者明君取下有節自養有度必計歲而收量民積聚知有餘不足之數然後取奉如此即得承所受於天地而不罹於飢寒之患惜恆於民也國有飢者食不重味民有寒者冬不被裘與民同苦樂則天下無哀民闇主即不然取民不裁其力求下不重其積男女不得耕織之業以供上求力勤財盡有且無暮君臣相疾且人之為生也一人蹠耒而耕不益十畝中田之收不過四石妻子老弱仰之而食或時有災害之患無以供上求即人主愍之矣貪主暴君涸漁其下以適無

極之欲則百姓不被天和履地德矣

堯之為君視民猶己取下有節自奉有度故人無惡逆比屋可封是以明君之治必計歲豐歉量民虛實然後取奉民無怨咨天亦無譴焉

老子曰天地之氣莫大於和和者陰陽調日夜分故萬物春分而生秋分而成生之與成必得和之精故積陰不生積陽不化陰陽交接乃能成和是以聖人之道寬而慄嚴而溫柔而直猛而仁夫太剛則折太柔則卷道正在於剛柔之間夫繩之為度也可卷而懷之引而伸之可直而布之長而不橫短而不窮直而不剛故聖人體之夫恩推即便使即不威嚴推即猛猛即不和愛推即縱縱即不令刑推即禍禍即無親是以貴和也

氣以和為主天地和而萬象明陰陽和而百物生君臣和而朝廷治父子和而家道成上下和而人事濟榮衛和而身康寧和之義大矣哉

老子曰國之所以存者得道也所以亡者理

塞也故聖人見化以觀其微德有昌衰風為先萌故得存道者雖小必大有亡微者雖成必敗國之亡也大不足恃道之行也小不可輕故存在得道不在於小亡在失道不在於大故亂國之主務於地廣而不務於仁義務在高位而不務於道德是捨其所以存而造其所以亡也若上亂三光之明下失萬民之心孰不能承故審其已者不備誦人也

天下通行之謂道萬古不易之謂理故道理最大自古有國家者得道則昌失理則亡夫務高位地廣而不務道德仁義猶木之無根槁仆可俟也

古之為君者深行之謂之道德淺行之謂之仁義薄行之謂之禮智此六者國家之綱維也深行之則厚得福淺行之則薄得福盡行之天下勝古之修道德即正天下修仁義即正一國修禮智即正一鄉德厚者大德薄者小故道不以雄武立不以堅強勝不以貪競得立在於天下推已勝在於天下自服得在於天下與之不在於自取故雌牝即立柔弱

即勝仁義即得不爭即莫能與之爭故道之在天下也譬猶江海也

道德仁義禮智根于心者一夫行之有淺深施之有厚薄名從實立六者分焉雖然同一善也上者善則下者莫敢不善後世

不修道德專以勢力為治而國危矣

天之道為者敗之執者失之夫欲名之大而求之爭之吾見其不得已雖執而得之不留也夫名不可求而得也在天下與之與之者歸之天下所歸者德也故云上德者天下歸之上仁者海內歸之上義者一國歸之上禮者一鄉歸之無此四者民不歸也不歸即用兵用兵即危道也故曰兵者不祥之器也不得已而用之用之殺傷人勝而勿美故曰死地荆棘生焉以悲哀泣之以喪禮居之是以君子務道德而不用重兵也

天道自然有為則失名者實之實名之大莫如君君有德則名不待求而天下與之與之者歸之也此二帝三王之所以優而五霸七雄之所以劣不用道德而務用兵

者去天道遠矣

文子問曰仁義禮智何以為薄於道德也老子曰為仁者必以哀樂論之為義者必以取與明之四海之內哀樂不能偏竭府庫之貨財不足以贍萬民故知不如修道而行德因

天地之性萬物自正而天下瞻仁義因附是以大丈夫居其厚不居其薄夫禮者實之文也仁者恩之効也故禮因人情而制不過其實仁不溢恩慈哀抱於情送死稱於仁

文子問仁義禮何以薄於道德老子語以為仁者必以哀樂論之為義者必以取與明之夫哀樂取與涉於有為海宇之民可哀者眾可樂者寡府庫之財取之有限與之易竭道德無為任萬物之自正而天下瞻足

夫養生不强人所不能及不絕人所不能已度量不失其適非譽無由生矣改制樂足以合離不出於和明於生死之分通於侈儉之適也未世即不然言與行相悖情與貌相反禮飾以煩樂擾以淫風俗濁於世非譽幸于

朝故至人廢而不用也與驥逐走即人不勝驥託於車上即驥不勝人故善用道者乘人之資以立功以其所能託其所不能也主與之以時民報之以財主遇之以禮民報之以死故有危國無安君有憂主無樂臣德過其

位者尊祿過其德者凶德貴無高義取無多不以德貴者竊位也不以義取者盜財也聖人安貧樂道不以欲傷生不以利累已故不違義而妄取

天下之生久矣夫得其養則生益善故賢君不强人所不能及亦不絕人所不能已位民均得其養是故安養而樂道不以欲傷生不違義而取其可多欲乎

古者無德不尊無能不官無功不賞無罪不誅其進人也以禮退人也以義小人之世其進人也若土之天其退人也若肉之病言古者以疾今也相馬失之疲選士失之質豚肥充厨骨皆不官君子察實無信讒言君過而不諫非忠臣也諫而不聽君不明也民沉溺而不憂非賢君也故守節死難人臣之職也

進人也若土之天其退人也若肉之病言古者以疾今也相馬失之疲選士失之質豚肥充厨骨皆不官君子察實無信讒言君過而不諫非忠臣也諫而不聽君不明也民沉溺而不憂非賢君也故守節死難人臣之職也

衣寒食飢慈父之恩也以大事小謂之變人
以小犯大謂之逆天前雖登天後必入國故
鄉里以齒老窮不遺朝廷以爵尊卑有差

選士之法如德行言語政事文學有一於
是宜可仕也四無一焉則是沐猴而冠矣

古者無德不尊無能不官無功不貴無罪
不誅故官不失人人不失用

夫宗貴者謂其近君也尊者謂其近親也
敬長者謂其近兄也色生而貴者驕生而富者
奢故富貴不以明道自鑒而能無為非者寡
矣學而不厭所以治身也教而不倦所以治
民也有賢師良友舍而為非者寡矣知賢之
謂智愛賢之謂仁尊賢之謂義敬賢之謂禮
樂賢之謂樂

父子主恩君臣主義我知恩義而忠孝之本
立能崇貴尊老敬長可謂知本矣能知賢
愛賢尊賢敬賢樂賢則求賢養賢用賢之
道得矣

古之善為天下者無為而無不為也故為天
下有容能得其容無為而有功不得其容動

作必凶為天下有容者豫若其若冬涉川猶
若其若畏四鄰儼若其若客燕若其若水之
液敷若其若撲混若其若濁廣若其若谷此
謂天下之容也豫若其若冬涉川者不敢行
也猶若其若畏四鄰者恐自傷也儼若其若

客者謹為恭敬也渙若其若水之液者不敢
積藏也敷若其若撲者不敢廉成也混若其
若濁者不敢清明也廣若其若谷者不敢盛
盈也進不敢行者退而不敢先也恐自傷者
守柔弱不敢矜也謹於恭敬者自卑下尊敬
人也不敢積藏者自損弊不敢堅也不敢廉
成者自虧缺不敢全也不敢清明者處濁辱
而不敢新鮮也不敢盛盈者見不足而不敢
自賢也夫道退故能先守柔弱故能矜自卑
下故能高人自損弊故實堅自虧缺故盛全
處濁辱故新鮮見不足故能賢道無為而無
不為也

孔德之容惟道是從古之善為天下者無
為而無不為天下之大民物之眾無不容
矣此無為之功所以大而天下之民所以

戴之而不重也

通玄真經續義卷之十